

摘藻堂四庫全書薈要

史部

欽定四庫全書薈要

史部
明史卷二百八十八
六至

詳校官兵部主事臣雷純



欽定四庫全書蒼要卷六千八百七十九

史部

明史卷二百八十六

大學士張廷玉等奉敕修

傳第一百七十四

文苑二

林鴻鄭定等

王紱夏杲

沈度弟衆
膝用亨等

聶大年

劉溥蘓平等

張弼



張泰

陸容

銑

程敏政

羅玘

儲巵

李夢陽

康王維楨

海

王九思

何景明

徐禎卿

楊循吉

寅

祝允明

邊貢

顧璘

弟

沂等

鄭善夫

殷雲霄

豪等

陸深

王圻

王廷陳

李濂

林鴻字子羽福清人洪武初以人才薦授將樂縣訓導

歷禮部精膳司員外郎性脫落不善仕年未四十自免
歸閩中善詩者稱十才子鴻為之冠十才子者閩鄭定
侯官王褒唐泰長樂高棟王恭陳亮永福王偁及鴻弟
子周元黃元時人目為二元者也鴻論詩大指謂漢魏
骨氣雖雄而菁華不足晉祖元虛宋尚條暢齊梁以下
但務春華少秋實惟唐作者可謂大成然貞觀尚習故
陋神龍漸變常調開元天寶閒聲律大備學者當以是
為楷式閩人言詩者率本於鴻晉府引禮舍人浦源字

長源無錫人也慕鴻名踰嶺訪之造其門二元請誦所作曰吾家詩也鴻延之入社鄭定字孟宣嘗為陳友定記室友定敗浮海亡交廣間久之還居長樂洪武中徵授延平府訓導歷國子助教王褒字中美鴻之兄子壻也為長沙學官遷永豐知縣永樂中召入預修大典擢漢府紀善唐泰字亨仲洪武二十七年進士歷陝西副使高棟字彥恢更名廷禮別號漫士永樂初以布衣召入翰林為待詔遷典籍性善飲工書畫尤專於詩其所

選唐詩品彙唐詩正聲終明之世館閣宗之王恭字安
中隱居七巖山自稱皆山樵者永樂初以儒士薦起待
詔翰林年六十餘與修大典書成授翰林院典籍陳亮
字景明自以故元儒生明興累詔不出作陳搏傳以見
志結草屋滄洲中與三山耆彥為九老會終其身不仕
王偁字孟敷父翰仕元抗節死偁方九歲父友吳海撫
教之洪武中領鄉薦入國學陳情養母母歿廬墓六年
永樂初用薦授翰林檢討與修大典學博才雄最為解

縉所重自負無輩行獨推讓同官王洪王洪者字希範
錢塘人八歲能文十八成進士授吏科給事中改翰林
檢討偕偁等與修大典歷修撰侍講帝頒佛曲於塞外
命洪為文逡巡不應詔為同列所排不復進用卒官而
偁後坐累謫交趾復以縉事連及繫死獄中黃元字元
之將樂人聞鴻棄官歸遂攜妻子居閩縣以歲貢官泉
州訓導周元字微之閩縣人永樂中以文學徵授禮部
員外郎嘗挾書千卷止高棟家讀十年辭去盡棄其書

曰在吾腹笥矣同時趙迪林敏陳仲宏鄭闕林伯璟張友謙亦以能詩名皆鴻之弟子

王紱字孟端無錫人博學工歌詩能書寫山木竹石妙絕一時洪武中坐累戍朔州永樂初用薦以善書供事文淵閣久之除中書舍人紱未仕時與吳人韓奕為友隱居九龍山遂自號九龍山人於書法動以古人自期畫不苟作游覽之頃酒酣握筆長廊素壁淋漓揮灑有投金幣購片楮者輒拂袖起或閉門不納雖豪貴人勿

顧也有諫之者紱曰丈夫宜審所處輕者如此重者將何以哉在京師月下聞吹簫聲乘興寫石竹圖明旦訪其人贈之則估客也客以紅氍毹餽請再寫一枝為配紱索前畫裂之還其餽一日退朝黔國公沐晟從後呼其字紱不應同列語之曰此黔國公也紱曰我非不聞之是必與我索畫耳晟走及之果以畫請紱領之而已踰數年晟復以書來紱始為作畫既而曰我畫直遺黔公不可黔公客平仲微者我友也以友故與之俟黔公

與求則可耳其高介絕俗如此崑山夏杲者亦善畫竹
石亞於綾畫竹一枝直白金一錠然人多以餽遺得之
杲字仲昭永樂十三年進士改庶吉士歷官太常寺卿
杲與上元張益同中進士同以文名同善畫竹其後杲
見益石渠閣賦自謂不如遂不復作賦益見杲所畫竹
石亦遂不復畫竹益死土木之難仲微名顯錢塘人嘗
知滕縣事謫戍雲南其為詩頗豪放自喜雲南詩人稱
平居陳郭顯其一也

沈度字民則弟粲字民望松江華亭人兄弟皆善書度以婉麗勝粲以遁逸勝度博涉經史為文章絕去浮靡洪武中舉文學弗就坐累謫雲南岷王具禮幣聘之數進諫未幾辭去都督瞿能與偕入京師成祖初即位詔簡能書者入翰林給廩祿度與吳縣滕用亨長樂陳登同與選是時解縉胡廣梁潛王璉皆工書度最為帝所賞名出朝士右日侍便殿凡金版玉冊用之朝廷藏秘府頒屬國必命之書遂由翰林典籍擢檢討厯修撰遷

侍講學士粲自翰林待詔遷中書舍人擢侍讀進階大理少卿兄弟並賜織金衣鏤姓名於象簡泥之以金贈父母如其官馳傳歸告於墓崑山夏昺者字孟暘與其弟杲以善書畫聞同官中書舍人時號大小中書而度粲號大小學士度性敦實謙以下人嚴取與有訓導介其友求書請識姓字於上度沈思曰得非曩許奏有司者耶遽却之其友固請終不肯書姓名其在內廷備顧問必以正對粲篤於事兄已有賜輒歸其兄滕用亨初

名權字用衡精篆隸書被薦時年七十矣召見大書麟鳳龜龍四字以進又獻貞符詩三篇授翰林待詔與修永樂大典用亨善鑒古嘗侍帝觀畫卷未竟衆目為趙伯駒用亨曰此王詵筆也至卷尾果然陳登字思孝初仕羅田縣丞改蘭谿再改浮梁選入翰林仍給縣丞祿歷十年始授中書舍人登於六書本原博考詳究用力甚勤自周秦以來殘碑斷碣必窮搜募搨審度而辨定之得其傳者太常卿南城程南雲也

聶大年字壽卿臨川人父同文洪武中官翰林侍書中書舍人燕王入京師迎謁道暍死死後五月而大年生母胡撫之比長博學善詩古文葉盛稱其詩謂三十年來絕唱也書得歐陽率更法宣德末薦授仁和訓導母卒歸葬哀感行路里人列其母子賢行上之有司詔旌其門服闋分教常州遷仁和教諭景泰六年薦入翰林未幾得疾卒始尚書王直以詩寄錢塘戴文進索畫自序昔與文進交嘗戲作詩一聯至是十年始成之大年

題其後曰公愛文進之畫十年不忘使以是心待天下
賢者天下寧復有遺賢哉直聞其言不怒亦不薦及大
年疾篤作詩貽直有鏡中白髮孰憐我湖上青山欲待
誰句直曰此欲吾志其墓耳遂為之志

劉溥字原博長洲人祖彥父士賓皆以醫得官溥八歲
賦溝水詩時目為聖童長侍祖父遊兩京研究經史兼
通天文歷數宣德時以文學徵有言溥善醫者授惠民
局副使調太醫院吏目恥以醫自名日吟咏為事其詩

初學西崑後更竒縱與湯允勣蘓平蘓正沈愚王淮晏
鐸鄒亮蔣忠王貞慶號景泰十才子溥爲主盟允勣東
甌王和曾孫自有傳蘇平字秉衡弟正字秉貞海寧人
兄弟竝以布衣終沈愚字通理昆山人業醫終其身王
淮字柏源慈谿人晏鐸字振之富順人由庶吉士授御
史歷按兩畿山東所至有聲坐言事謫上高典史鄰境
寇發官兵不能討鐸捕滅之歸所掠於民鄒亮字克明
長洲人用況鍾薦擢吏部司務遷御史蔣忠字主忠儀

真人徙居句容王貞慶字善甫駙馬都尉寧子也折節好士有詩名時稱金粟公子

張弼字汝弼松江華亭人成化二年進士授兵部主事進員外郎遷南安知府地當兩廣衝奸人聚山谷為惡悉捕滅之毀淫祠百數十區建為社學謝病歸士民為立祠弼自幼穎拔善詩文工草書怪偉跌宕震撼一世自號東海張東海之名流播外裔為詩信手縱筆多不屬稿即有所屬以書故輒為人持去與李東陽謝鐸善

嘗自言吾平生書不如詩詩不如文東陽戲之曰英雄欺人每如此不足信也鐸稱其好學不倦詩文成一家言子弘至自有傳

張泰字亨父太倉人陸鉞字鼎儀崑山人陸容字文量亦太倉人三人少齊名號婁東三鳳泰舉天順八年進士選庶吉士授檢討遷修撰為人恬淡自守詩名亞李東陽弘治間藝苑皆稱李懷麓張滄洲東陽有懷麓堂集泰有滄洲集也鉞與泰同年進士殿試第二授編修

歷修撰諭德孝宗立以東宮講讀勞進太常少卿兼侍
讀得疾歸泰鉞皆早卒容成化中進士授南京主事進
兵郎職方郎中西番進獅子奏請大臣往迎容諫止之
遷浙江參政罷歸

程敏政字克勤休寧人南京兵部尚書信子也十歲侍
父官四川巡撫羅綺以神童薦英宗召試悅之詔讀書
翰林院給廩饌學士李賢彭時咸愛重之賢以女妻焉
成化二年進士及第授編修歷左諭德直講東宮翰林

中學問該博稱敏政文章古雅稱李東陽性行真純稱
陳音各為一時冠孝宗嗣位擢少詹事兼侍講學士直
經筵敏政名臣子才高負文學俯視儕偶頗為人所疾
弘治元年冬御史王嵩等以雨災劾敏政勒致仕六年
召還尋改太常寺兼侍讀學士掌院事八年以內艱歸
服闋轉詹事侍郎專典內閣誥敕十二年與東陽主會
試舉人徐經唐寅預作文與試題合給事中華景劾敏
政鬻題時榜未發詔敏政毋閱卷其所錄者令東陽會

同考官覆校二人卷皆不在所取中東陽以聞言者猶
不已敏政景經寅俱下獄坐經嘗贊見敏政寅嘗從敏
政乞文熙為吏敏政勸致仕而景以言事不實調南太
僕主簿敏政出獄憤恚發癰卒後贈禮部尚書或言敏
政之獄傳瀚欲奪其位令景奏之事祕莫能明也

羅玘字景鳴南城人博學好古文務為奇奧年四十困
諸生輸粟入國學邱濬為祭酒議南人不得留北監玘
固請不已濬罵之曰若識幾字崛彊乃爾玘仰對曰惟

中祕書未讀耳濬姑留之他日試以文乃大驚異成化
末領京闈鄉試第一明年舉進士選庶吉士授編修益
肆力古文每有作或據高樹或閑坐一室瞑目隱度形
容灰槁自此文益竒玘亦厚自負尤尚節義臺諫救劉
遜盡下獄玘言當優容以全國體中官李廣死遺一籍
具識大臣賄交者帝怒命言官指名劾奏玘上言曰大
臣表正百僚今若此固宜寘重典然天下及四裔皆仰
望之一旦指名暴其惡啓遠人慢朝廷心言官未見籍

記憑臆而論安辨玉石一經攻摘且玷終身臣請降敕
密諭使引疾退或斥以他事庶不為朝廷羞而仕路亦
清李夢陽下獄玘言壽寧侯託肺腑當有以保全之夢
陽不保為侯累帝深納焉秩滿進侍讀正德初遷南京
太常少卿劉瑾亂政李東陽依違其間玘東陽所舉士
也貽書責以大義且請削門生之籍尋進本寺卿擢南
京吏部右侍郎遇事嚴謹僚屬畏憚畿輔盜縱橫而皇
儲未建玘疏論激切且侵執政者七年冬考績赴都遂

引疾致仕歸寧王宸濠慕其名遣使餽玘避之深山及
叛玘已病馳書巡撫王守仁約討賊事未舉而卒嘉靖
初贈禮部尚書賜諡文肅學者稱圭峰先生

儲巘字靜夫泰州人九歲能屬文母疾刲股療之卒不
起家貧力營墓域旦哭冢夜讀書不輟成化十九年鄉
試明年會試皆第一授南京考功主事孝宗嗣位疏薦
前直諫貶謫者主事張吉王純中書舍人丁璣進士李
文祥吉等皆錄用久之進郎中吏部尚書耿裕知其賢

調北部考注臧否一出至公嘗覈實一官裕欲改其評
巵正色曰公所執何異王介甫羣僚咸在側裕大慚徐
曰郎中言是然非我莫能容也擢太僕少卿請命史官
記注言動如古左右史時不能用進本寺卿武宗立塞
上有警條禦邊五事又陳馬政病民者四事多議行正
德二年改左僉都御史總督南京糧儲召為戶部右侍
郎尋轉左督倉場所至宿弊盡釐劉瑾用事數陵侮大
臣獨敬巵稱為先生巵憤其所為五年春引疾求去詔

許乘傳有司俟疾痊以聞其秋瑾敗以故官召辭不赴
後起南京戶部左侍郎就改吏部卒官巵體貌清羸若
不勝衣淳行清修介然自守工詩文好推引知名士辟
遠非類不惡而嚴進士顧璘嘗謁尚書邵寶寶語曰子
立身當以柴墟為法柴墟者巵別名也嘉靖初賜諡文
懿

李夢陽字獻吉慶陽人父正官周王府教授陟居開封
母夢日墮懷而生故名夢陽弘治六年舉陝西鄉試第

一明年成進士授戶部主事遷郎中權闕格勢要搆下

獄得釋十八年應詔上書陳二病三害六漸凡五千餘

言極論得失末言壽寧侯張鶴齡招納無賴罔利賊民

勢如翼虎鶴齡奏辨摘疏中陛下厚張氏語誣夢陽訕

母后為張氏罪當斬時皇后有寵后母金夫人泣懇帝

帝不得已繫夢陽錦衣獄尋宥出奪俸金夫人懇不已

帝弗聽召鶴齡聞處切責之鶴齡免冠叩頭乃已左右

知帝護夢陽請母重罪而予杖以洩金夫人憤帝又弗

許謂尚書劉大夏曰若輩欲以杖斃夢陽耳吾寧殺直臣快左右心乎他日夢陽途遇壽寧侯詈之擊以馬箠墮二齒壽寧侯不敢校也孝宗崩武宗立劉瑾等八虎用事尚書韓文與其僚語及而泣夢陽進曰公大臣何泣也文曰柰何曰比言官劾羣奄閣臣持其章甚力公誠率諸大臣伏闕爭閣臣必應之去若輩易耳文曰善屬夢陽屬草會語洩文等皆逐去瑾深憾之矯旨謫山西布政使經歷勒致仕既而瑾復撫他事下夢陽獄將

叙之康海為說瑾乃免瑾誅起故官遷江西提學副使
令甲副使屬總督夢陽與相抗總督陳金惡之監司五
日會揖巡按御史夢陽又不往揖且敕諸生毋謁上官
即謁長揖毋跪御史江萬實亦惡夢陽淮王府校與諸
生爭夢陽笞校王怒奏之下御史按治夢陽恐萬實右
王許萬實詔下總督金行勘金檄布政使鄭岳勘之夢
陽偽撰萬實劾金疏以激怒金并搆岳子云通賄事寧
王宸濠者浮慕夢陽嘗請撰陽春書院記又惡岳乃助

夢陽劾岳萬實復奏夢陽短及偽為奏草事參政吳廷
舉亦與夢陽有隙上疏論其侵官不俟命徑去詔遣大
理卿燕忠往鞫召夢陽羈廣信獄諸生萬餘為訟寃不
聽劾夢陽陵轍同列挾制上司遂以冠帶閒住去亦褫
岳職謫戍沅奪廷舉俸夢陽既家居益跼弛負氣治園
池招賓客日縱俠少射獵繁臺晉邱間自號空同子名
震海內宸濠反誅御史周宣劾夢陽黨逆被逮大學士
楊廷和尚書林俊力救之坐前作書院記削籍頃之卒

子枝進士夢陽才思雄鷲卓然以復古自命弘治時宰相李東陽主文柄天下翕然宗之夢陽獨譏其萎弱倡言文必秦漢詩必盛唐非是者弗道與何景明徐禎卿邊貢朱應登顧璘陳沂鄭善夫康海王九思等號十才子又與景明禎卿貢海九思王廷相號七才子皆卑視一世而夢陽尤甚吳人黃省曾越人周祚千里致書願為弟子迨嘉靖朝李攀龍王世貞出復奉以為宗天下推李何王李為四大家無不爭效其體華州王維禎以

為七言律自杜甫以後善用頓挫倒插之法惟夢陽一人而後有譏夢陽詩文者則謂其模擬剽竊得史遷少

陵之似而失其真云康海字德涵武功人弘治十五年殿試第一授修撰與夢陽輩相倡和訾議諸先達忌者頗衆正德初劉瑾亂政以海同鄉慕其才欲招致之海不肯往會夢陽下獄書片紙招海曰對山救我對山者海別號也海乃謁瑾瑾大喜為倒屣迎海因設詭辭說之瑾意解明日釋夢陽踰年瑾敗海坐黨落職王九思

字敬夫鄆人弘治九年進士由庶吉士授檢討尋調吏部至郎中亦以瑾黨謫壽州同知復被論勒致仕海九思同里同官同以瑾黨廢每相聚汴東鄆杜間挾聲伎酣飲製樂造歌曲自比俳優以寄其怫鬱九思嘗費重貲購樂工學琵琶海搗彈尤善後人傳相倣效大雅之道微矣王維禎字允寧嘉靖十四年進士擢庶吉士累官南京國子祭酒家居地大震壓死維禎頽而哲自負經世才職文墨不得少效於世使酒謾罵人多畏而遠

之於文好司馬遷於詩好杜甫而其意以夢陽兼此二人終身所服膺效法者夢陽也

何景明字仲默信陽人八歲能詩古文弘治十一年舉於鄉年方十五宗藩貴人爭遣人員視所至聚觀若堵十五年第進士授中書舍人與李夢陽輩倡詩古文夢陽最雄駿景明稍後出相與頡頏正德改元劉瑾竊柄上書吏部尚書許進勸其秉政毋撓語極激烈已遂謝病歸踰年瑾盡免諸在告者官景明坐罷瑾誅用李東

陽薦起故秩直內閣制敕房李夢陽下獄衆莫敢為直
景明上書吏部尚書楊一清救之九年乾清宮災疏言
義子不當畜邊軍不當留番僧不當寵宦官不當任留
中久之進吏部員外郎直制敕如故錢寧欲交驩以古
畫索題景明曰此名筆母汚人手留經年終擲還之尋
擢陝西提學副使廖鵬弟太監鑑鎮關中橫甚諸參隨
遇三司不下馬景明執撻之其教諸生專以經術世務
遴秀者於正學書院親為說經不用諸家訓詁士始知

有經學嘉靖初引疾歸未幾卒年三十有九景明志操
耿介尚節義鄙榮利與夢陽竝有國士風兩人為詩文
初相得甚歡名成之後互相詆譏夢陽主摹倣景明則
主剏造各樹堅壘不相下兩人交游亦遂分左右袒說
者謂景明之才本遜夢陽而其詩秀逸穩稱視夢陽反
為過之然天下語詩文必竝稱何李又與邊貢徐禎卿
竝稱四傑其持論謂詩溺於陶謝力振之古詩之法亡
於謝文靡於隋韓力振之古文之法亡於韓其意蓋詆

夢陽非篤論也

徐禎卿字昌穀吳縣人資穎特家不蓄一書而無所不通自為諸生已工詩歌與里人唐寅善寅言之沈周楊循吉由是知名舉弘治十八年進士孝宗遣中使問禎卿與華亭陸深名深遂得館選而禎卿以貌寢不與授大理左寺副坐失囚貶國子博士禎卿少與祝允明唐寅文徵明齊名號吳中四才子其詩為喜白居易劉禹錫既登第與李夢陽何景明游悔其少作改而趨漢魏

盛唐然故習猶在夢陽譏其守而未化卒年二十有三
禎卿體癯神清詩鎔鍊精警為吳中詩人之冠年雖不
永名滿士林子伯虬舉人亦能詩楊循吉字君謙吳縣
人成化二十年進士授禮部主事善病好讀書每得意
手足蹕掉不能自禁用是得顛主事名一歲中數移病
不出弘治初奏乞改教不許遂請致仕歸年纔三十有
一結廬支硎山下課讀經史旁通內典稗官父母歿傾
貲治葬寢苦墓側性狷隘好持人短長又好以學問窮

人至頗赤不顧清寧宮災詔求直言馳疏請復建文帝

尊號格不行武宗駐蹕南都召賦打虎曲稱旨易武人

裝日侍御前為樂府小令帝以優俳畜之不授官循古

以為恥閱九月辭歸既復召至京會帝崩乃還嘉靖中

獻九廟頌及華陽求嗣齋儀報聞而已晚歲落窶益堅

癖自好尚書顧璘道吳以幣贊促膝論文歡甚俄郡守

邀璘璘將赴之循吉忽色變驅之出擲還其幣明日璘

往謝閉門不納卒年八十九其詩文自定為松籌堂集

他所作又十餘種幾及千卷祝允明字希哲長洲人祖

顯正統四年進士內侍傳旨試能文者四人顯與焉入

掖門知欲令教小內監也不試而出由給事中歷山西

參政竝有聲允明以弘治五年舉於鄉久之不第授廣

東興寧知縣捕戮盜魁三十餘邑以無警稍遷應天通

判謝病歸嘉靖五年卒允明生而枝指故自號枝山又

號枝指生五歲作徑尺字九歲能詩稍長博覽羣集文

章有奇氣當筵疾書思若湧泉尤工書法名動海內好

酒色六博善新聲求文及書者踵至多賄妓掩得之惡
禮法士亦不問生產有所入輒召客豪飲費盡乃已或
分與持去不留一錢晚益困每出追呼索逋者相隨於
後允明益自喜所著有詩文集六十卷他雜著百餘卷
子續正德中進士仕至廣西左布政使唐寅字伯虎一
字子畏性穎利與里狂生張靈縱酒不事諸生業祝允
明規之乃閉戶決歲舉弘治十一年鄉試第一座主梁
儲奇其文還朝示學士程敏政敏政亦奇之未幾敏政

總裁會試江陰富人徐經賄其家僮得試題事露言者
劾敏政語連寅下詔獄謫為吏寅恥不就歸家益放浪
寧王宸濠厚幣聘之寅察其有異志佯狂使酒露其醜
穢宸濠不能堪放還築室桃花塢與客日般飲其中年
五十四而卒寅詩文初尚才情晚年頽然自放謂後人
知我不在此論者傷之吳中自允明輩以放誕不羈為
世所指目而文才輕豔傾動流輩傳說者增益而附麗
之往往出名教外時常熟有桑悅者字民懌尤怪妄亦

以才名吳中書過目輒焚棄曰已在吾腹中矣敢為大
言以孟子自況或問翰林文章曰虛無人舉天下惟悅
其次祝允明又次羅此為諸生上謁監司曰江南才子
監司大駭延之校書預刊落以試悅文義不屬者索筆
補之年十九舉成化元年鄉試試春官答策語不雅馴
被斥三試得副榜年二十餘耳年籍誤二為六遂除泰
和訓導學士邱濬重其文屬學使者善遇之使者至問
悅不迎豈有恙乎長吏皆銜之曰無恙自負才名不肯

謁耳使者遣吏召不至益兩使促之悅怒曰始吾謂天下未有無耳者乃今有之與若期三日後來瀆則不來矣使者恚欲收悅緣瀆故不果三日來見長揖使者使者怒悅脫帽竟去使者下階謝乃已遷長沙通判調柳州會外艱歸遂不出居家益狂誕鄉人莫不重其文而駭其行初悅在京師見高麗使臣市本朝兩都賦無有以為恥遂賦之居長沙著庸言自以為窮究天人之際所著書頗行於世

邊貢字廷實歷城人祖寧應天治中父節代州知州貢年二十舉於鄉第弘治九年進士除太常博士擢兵科給事中孝宗崩疏劾中官張瑜太醫劉文泰高廷和用藥之謬又劾中官苗達保國公朱暉都御史史琳用兵之失改太常丞遷衛輝知府改荊州並能其官歷陝西河南提學副使以母憂家居嘉靖改元用薦起南京太常少卿三遷太常卿督四夷館擢刑部右侍郎拜戶部尚書並在南京貢早負才名美風姿所交悉海內名士

久官留都優閒無事游覽江山揮毫浮白夜以繼日都御史劾其縱酒廢職遂罷歸

顧璘字華玉上元人弘治九年進士授廣平知縣擢南京吏部主事晉郎中正德四年出為開封知府數與鎮守大監廖堂王宏忤逮下錦衣獄謫全州知州秩滿遷台州知府歷浙江左布政使山西湖廣巡撫右副都御史所至有聲遷吏部右侍郎改工部董顯陵工畢遷南京刑部尚書罷歸年七十餘卒璘少負才名與何李相

上下虛已好士如恐不及在浙慕孫太初一元不可得
見道衣幅巾放舟湖上月下見小舟泊斷橋一僧一鶴
一童子煮茗笑曰此必太初也移舟就之遂往還無間
撫湖廣時愛王廷陳才欲見之廷陳不可偵廷陳狎游
疾掩之廷陳避不得遂定交既歸構息園大治幸舍居
客客常滿從弟璵字英玉以河南副使歸居園側一小
樓教授自給璘時時與客豪飲伎樂雜作呼璵璵終不
赴其孤介如此初璘與同里陳沂王韋號金陵三俊其

後寶應朱應登繼起稱四大家璘詩矩矱唐人以風調
勝韋婉麗多致頗失纖弱沂與韋同調應登才思泉湧
落筆千言然璘應登羽翼李夢陽而韋沂則頗持異論
二人者仕宦皆不及璘陳沂字魯南正德中進士由庶
吉士歷編修侍講出為江西叅議量移山東叅政以不
附張孚敬桂萼改行太僕卿致仕王韋字欽佩父徽成
化時給事中直諫有聲韋舉弘治中進士由庶吉士歷
官太僕少卿子逢元亦能詩朱應登字升之弘治中進

士歷雲南提學副使遷叅政恃才傲物中飛語罷歸子
曰藩嘉靖間進士終九江知府能文章世其家南郡自
洪永初風雅未暢徐霖陳鐸金琮謝璿輩談藝正德時
稍稍振起自璿主詞壇士大夫希風附塵厥道大彰許
穀陳鳳璿子少南金大車大輿金鑾盛時泰陳芹之屬
並從之游穀等皆里人鑾僑居客也儀真蔣山卿江都
趙鶴亦與璿遙相應和沿及末造風流未歇云

鄭善夫字繼之閩縣人弘治十八年進士連遭內外艱

正德六年始為戶部主事權稅許墅以清操聞時劉瑾
雖誅嬖倖用事善夫憤之乃告歸築草堂金鰲峰下為
遲清亭讀書其中曰俟天下之清也寡交將日晏未炊
欣然自得起禮部主事進員外郎武宗將南巡偕同列
切諫杖於廷罰跪五日善夫更為疏草置懷中屬其僕
曰死即上之幸不死歎曰時事若此尚可覩顏就列哉
乞歸未得明年力請乃得歸嘉靖改元用薦起南京刑
部郎中未上改吏部行抵建寧便道游武夷九曲風雪

絕糧得病卒年三十有九善夫敦行誼婚嫁七弟妹皆
悉推予之葬母黨二十二人所交盡名士與孫一元殷
雲霄方豪尤友善作詩力摹少陵雲霄字近夫壽張人
善夫同年進士作蓄父堂聚書數千卷以作者自命正
德中官南京給事中武宗納有娠女子馬姬宮中雲霄
偕同官疏諫引李園呂不韋事為諷不報卒官年三十
有七鄉人穆孔暉畏雲霄峭直曰殷子恥不善不帝負
穢然方豪字思道開化人正德三年進士除崑山知縣

遷刑部主事諫武宗南巡跪闕下五日復受杖歷官湖
廣副使罷歸一元見隱逸傳閩中詩文自林鴻高棟後
閱百餘年善夫繼之迨萬厯中年曹學佺徐勣輩繼起
謝肇淛鄧原岳和之風雅復振焉學佺詳見後傳勣字
興公閩縣人兄燭萬厯間舉人勣以布衣終博聞多識
善草隸書積書黿峰書舍至數萬卷肇淛字在杭萬厯
三十年進士官工部郎中視河張秋作北河紀略具載
河流原委及厯代治河利病終廣西右布政使原岳字

汝高亦閩縣人肇淞同年進士終湖廣副使

陸深字子淵上海人弘治十八年進士選庶吉士授編
修正德四年劉瑾嫉翰林官亢已悉改外深得南京主
事瑾誅復職歷國子司業祭酒充經筵講官奏講官撰
進講章閣臣不宜改竄忤輔臣謫延平同知晉山西提
學副使改浙江累官四川左布政使松茂諸番亂深主
調兵食有功賜金幣旋召擢光祿卿進太常卿兼侍讀
學士世宗南巡深掌行在翰林院印御筆刪侍讀二字

正德六年始為戶部主事權稅許墅以徐禎卿相切磨
為文章有名工書倣李邕趙孟頫賞鑒博雅為詞臣冠
然頗倨傲人以此少之同邑有王圻者字元翰嘉靖四
十四年進士除清江知縣調萬安擢御史忤時相出為
福建按察使僉事謫邛州判官兩知進賢曹縣開州知
州歷官陝西布政叅議乞養歸築室淞江之濱種梅萬
樹目曰梅花源以著書為事年踰耄耋猶篝燈帳中丙
夜不輟所撰續文獻通考諸書行世初圻以奏議為趙

貞吉所推張居正與貞吉交惡諷圻攻之不應高拱為圻座主時方修隙徐階又以圻為私其鄉人不助已不能無恚遂撫拾之

王廷陳字穉欽黃岡人父濟吏部郎中廷陳穎慧絕人幼好弄父扶之輒大呼曰大人奈何虐天下名士正德十二年成進士選庶吉士益恃才放恣故事兩學士為館師體嚴重廷陳伺其退食獨上樹杪大聲叫呼兩學士無如之何佯弗聞也武宗下詔南巡與同館舒芬等

七人將疏諫館師石瑄力止之建陳賦烏母謠大書於
壁以刺瑄及執政皆不悅已而疏上帝怒罰跪五日杖
於廷時已改吏科給事中乃出為裕州知州廷陳不習
為吏又失職怨望簿牒堆案漫不省視夏日裸跣坐堂
皇見飛鳥集庭樹輒止訟者取彈彈之上官行部不出
迎已而布政使陳鳳梧及巡按御史喻茂堅先後至廷
陳以鳳梧座主特出迓鳳梧好謂曰子候我固善御史
即來候之當倍謹廷陳許諾及茂堅至銜其素驕蹇有

意裁抑之以小過擄州吏廷陳為跪請茂堅故益甚廷
陳大罵曰陳公誤我直上堂搏茂堅恚呼吏卒出鎖其
門禁絕供億且將具奏茂堅大窘鳳梧為解乃夜馳去
尋上疏劾之適裕人被案者逸出奏廷陳不法事收捕
繫獄削籍歸世宗踐祚前直諫被謫者悉復官獨廷陳
以星吏議不與屏居二十餘年嗜酒縱倡樂益自放廢
士大夫造謁多蓬髮赤足不具賓主禮時衣紅紫窄袖
衫騎牛跨馬嘯歌田野間嘉靖十八年詔修承天大志

巡撫顧璘以廷陳及顏木王格薦書成不稱旨賜銀幣而已廷陳才高詩文重當世一時才士鮮能過之木應山人官亳州知州格京山人官河南僉事

李濂字川父祥符人舉正德八年鄉試第一明年成進士授沔陽知州稍遷寧波同知擢山西僉事嘉靖五年以大計免歸年纔三十有八濂少負俊才時從俠少年聯騎出城搏獸射雉酒酣悲歌慨然慕信陵君侯生之為人一日作理情賦友人左國璣持以示李夢陽夢陽

大嗟賞訪之吹臺濫自此聲馳河雒間既罷歸益肆力
於學遂以古文名於時初受知夢陽後不屑附和里居
四十餘年著述甚富

明史卷二百八十六

欽定四庫全書

明史卷二百八十六考證

林鴻傳

鄭定等附

王傅字孟敷父翰仕元抗節死

臣

方煒按翰仕元為閩行省中後為潮州路總管棄官走閩為黃冠棲永泰山中太祖聞其賢詔有司強起之遂自刎死見獻徵錄傳未詳謹附識

王紱傳洪武中累戍朔州

臣

方煒按紱以何事坐累

獻徵錄諸書均無可考謹識

王紱傳

夏景附

永樂十三年進士改庶吉士歷官太常

寺卿

臣

方煒按景由進士為中書舍人累進太常

寺卿遷本寺卿見

御製書畫譜與此小異謹附考

沈度傳坐累謫雲南

臣

方煒按度以何事坐累明實

錄均無可考謹識

沈度傳

弟粲附

崑山夏昺者字孟暘與其弟景以善書

畫聞同官中書舍人時號大小中書而度粲號大小

學士

臣

方煒按曷洪武末為永寧丞謫戍雲南永

樂初畧入中書科習字上臨視稱善畧因言及曷召
對稱旨遂並命為中書舍人見識大錄謹附識

程敏政傳擢少詹事

臣

方煒按敏政為少詹時詔議

從祀諸賢敏政請斥戴聖劉向賈逵馬融何休王肅
王弼杜預八人及公伯寮秦冉顏何遽瑗林放荀况
等而進鄭眾王通胡瑗下廷臣議為學士吳寬侍郎
倪岳等所格嘉靖時卒用其議見識大錄謹附識

羅圮傳臺諫救劉遜盡下獄

臣方煒按是時遜知武

岡以忤岷藩被逮給事中龐泮等救之並下詔獄見

識大錄謹附識

羅圮傳臣請降敕密諭使引疾退或斥以他事庶不為

朝廷羞而仕路亦清

臣方煒按當時南京科道楊

廉洪遠等交章劾圮妄言亂政且言尚書屠滸白昂
必不可不去帝不問見明實錄謹附識

儲巘傳疏薦前直隸貶謫者主事張吉王純中書舍人

丁璣進士李文祥吉等

臣方煒按明實錄 璣爾時

薦直諫貶謫者前有前進士謫廣西縣縣丞教毓元
與吉時共五人此所載獨遺毓元謹附考

儲燿傳條禦邊五事

臣方煒按燿所陳禦邊五事馬

政四事諸書皆無可考謹識

李夢陽傳應詔上書陳二病三害六漸凡五千餘言極

論得失

臣

方煒按夢陽所陳二病三害六漸明實

錄及獻徵錄諸書皆無可考謹識

李夢陽傳萬實復奏夢陽短及偽為奏草事

臣方煒

按是時吉安知府劉喬嘗為夢陽所挫辱乃求夢陽

短及偽為奏草事白萬實令奏之見識大錄謹附識

李夢陽傳

康海附

殿試第一授修撰

臣

方煒按海定

試時孝宗見海策謂輔臣曰明興百五十年無此文體是可以復古矣遂置第一見識大錄謹附識

李夢陽傳

王九思附

由庶吉士授檢討尋調吏部至郎

中

臣

方煒按正德四年四月孝宗實錄成預纂修

者當遷秩瑾惡翰林素不附已於是調侍講吳一鵬及九思等十六人於是北六部名曰擴充政事見明實錄謹附識

邊貢傳都御史劾其縱酒廢職遂罷歸

臣方煒按是

時劾貢廢職者為都御史汪鉉見明實錄謹附識

顧璘傳歷浙江左布政使山西湖廣巡撫右副都御史所至有聲遷吏部右侍郎改工部董顯陵工畢遷南京刑部尚書

臣方煒按識大錄稱璘於嘉靖十一

年召拜石副都御史巡撫山西乞終養落職百落憲
職以布政使致仕十六年再起為副都御史巡撫湖
廣十八年拜刑部侍郎轉吏部顯陵畢工晉工部尚
書事竣遂遷南刑部尚書皆與此小異謹附考

鄭善夫傳嘉靖改元用薦起南京刑部郎中

臣方煒

按是時薦起善夫者為都御史周季鳳御史汪瑯見
識大錄謹附識

鄭善夫傳

殷雲霄傳

官南京給事中

臣方煒按雲霄

由進士授靖江知縣調青田遷南京工科給事中見
獻徵錄傳未詳載謹附識

陸深傳致仕卒謚文裕

臣方煒按深以嘉靖二十三

年七月卒賜謚時並贈禮部右侍郎見明實錄傳未
載謹附考

王廷陳傳已而疏上帝怒罰跪五日杖於廷

臣方煒

按廷陳是時與舒芬汪應軫江暉曹嘉馬汝驥合疏
劾江彬罪見明實錄謹附識

欽定四庫全書

卷二百八十六

欽定四庫全書薈要卷六千八百八十

史部

明史卷二百八十七

大學士張廷玉等奉 敕修

列傳一百七十五

文苑三

文徵明

蔡

羽等

黃

佐

歐大任
黎民表

柯維騏

王慎中

屠應峻等

高叔嗣

蔡汝楠

陳東

李開先

熊過

田汝成

子藝衡

皇甫湊

弟

沖

沔

茅坤

子維

謝榛

盧

枏

李攀龍

梁有譽等

王世貞

汪道昆
弟世懋

歸有光

子子慕
胡友信

文徵明長洲人初名璧以字行更字徵仲別號衡山父

林溫州知府叔父森右僉都御史林卒吏民醵千金為

賻徵明年十六悉却之吏民修故却金亭以配前守何

文淵而記其事徵明幼不慧稍長穎異挺發學文於吳

寬學書於李應楨學畫於沈周皆父友也又與祝允明
唐寅徐禎卿輩相切劘名日益著其為人和而介巡撫
俞諫欲遺之金指所衣藍衫謂曰敝至此邪徵明佯不
喻曰遭雨敝耳諫竟不敢言遺金事寧王宸濠慕其名
貽書幣聘之辭病不赴正德末巡撫李充嗣薦之會徵
明亦以歲貢生詣吏部試奏授翰林院待詔世宗立預
修武宗實錄侍經筵歲時頒賜與諸詞臣齒而是時專
尚科目徵明意不自得連歲乞歸先是林知溫州識張

璉諸生中璉既得勢諷徵明附之辭不就楊一清召入
輔政徵明見獨後一清亟謂曰子不知乃翁與我友邪
徵明正色曰先君棄不肖三十餘年苟以一字及者弗
敢忘實不知相公與先君友也一清有慚色尋與璉謀
欲徙徵明官徵明乞歸益力乃獲致仕四方乞詩文書
畫者接踵於道而富貴人不易得片楮尤不肯與王府
及中人曰此法所禁也周徽諸王以寶玩為贈不啓封
而還之外國使者道吳門望里肅拜以不獲見為恨文

筆徧天下門下士屬作者頗多徵明亦不禁嘉靖三十
八年卒年九十矣長子彭字壽承國子博士次子嘉字
休承和州學正並能詩工書畫篆刻世其家彭孫震孟
自有傳吳中自吳寬王鏊以文章領袖館閣一時名士
沈周祝允明輩與並馳騁文風極盛徵明及蔡羽黃省
曾袁袞皇甫沖兄弟稍後出而徵明主風雅數十年與
之遊者王寵陸師道陳道復王穀祥彭年周天球錢穀
之屬亦皆以詞翰名於世蔡羽字九達由國子生授南

京翰林院孔目自號林屋山人有林屋南館二集自負甚高文法先秦兩漢或謂其詩似李賀羽曰吾謂求出魏晉上今乃為李賀邪其不肯屈抑如此黃省曾字勉之舉鄉試從王守仁湛若水游又學詩於李夢陽所著有五嶽山人集子姬水字淳父有文名學書於祝允明袁袞字永之七歲能詩舉嘉靖五年進士改庶吉士張璁惡之出為刑部主事累遷廣西提學僉事兩廣自韓雍後監司謁督府率庭跪袞獨長揖無何謝病歸子曾

尼字魯望亦官山東提學副使有文名王寵字履吉別號雅宜少學於蔡羽居林屋者三年既而讀書石湖由諸生貢入國子僅四十而卒行楷得晉法書無所不觀陸師道字子傳由進士授工部主事改禮部以養母請告歸歸而游徵明門稱弟子家居十四年乃復起累官尚寶少卿善詩文工小諧古篆繪事人謂徵明四絕不減趙孟頫而師道並傳之其風尚亦畧相似平居不妄交游長吏罕識其面女字卿子適趙宦光夫婦皆有聞

於時陳道復名淳以字行祖璫副都御史淳受業徵明以文行著善書畫自號白陽山人王穀祥字祿之由進士改庶吉士歷官吏部員外郎忤尚書汪鋐左遷真定通判以歸與師道俱有清望彭年字孔嘉其人亦長者周天球字公瑕錢穀字叔寶天球以書穀以畫皆繼徵明表表吳中者也其後華亭何良俊亦以歲貢生入國學當路知其名用蔡羽例特授南京翰林院孔目良俊字元朗少篤學二十年不下樓與弟良傳並負俊才良

傳舉進士官南京禮部郎中而良俊猶滯場屋與上海
張之象同里徐獻忠董宜陽友善並有聲及官南京趙
貞吉王維楨相繼掌院事與相得甚歡良俊居久之慨
然歎曰吾有清森閣在海上藏書四萬卷名畫百籤古
法帖彝鼎數十種棄此不居而僕僕牛馬走乎遂移疾
歸海上中倭復居金陵者數年更買宅居吳閭年七十
始返故里徐獻忠字伯臣嘉靖中舉於鄉官奉化知縣
著書數百卷卒年七十七王世貞私謚曰貞憲董宜陽

字子元張之象字月鹿祖萱湖廣參議父鳴謙順天通判之象由諸生入國學授浙江按察司知事以吏隱自命歸益務撰著晚居秀林山罕入城市卒年八十一

黃佐字才伯香山祖瑜長樂知縣以學行聞正德中佐舉鄉試第一世宗嗣位始成進士選庶吉士嘉靖初授編修陳初政要務又請修舉新政疏皆留中尋省親歸便道謁王守仁與論知行合一之旨數相辨難守仁亦稱其直諒還朝會出諸翰林為外僚除江西僉事旋

改督廣西學校聞母病引疾乞休不俟報竟去下巡撫
林富逮問富言佐誠有罪第為親受過於情可原乃令
致仕家居九年簡宮僚命以編修兼司諫尋進侍讀掌
南京翰林院召為右諭德擢南京國子祭酒母憂除服
起少詹事謁大學士夏言與論河套事不合會吏部缺
左侍郎所司推禮部右侍郎崔桐及佐給事中徐霈御
史艾朴言桐與左侍郎許成名競進至相詬詈而佐及
同官王用賓亦爭覬望惟恐或先之宜皆止勿用言從

中主之遂皆賜罷佐學以程朱為宗惟理氣之說獨持
一論平生撰述至二百六十餘卷所著樂典自謂洩造
化之秘年七十七卒穆宗詔贈禮部右侍郎謚文裕佐
弟子多以行業自飭而梁有譽歐大任黎民表詩名最
著云歐大任字楨伯順德人由歲貢生歷官南京工部
郎中年八十而終黎民表字惟敬從化人御史貫子也
舉鄉試久不第授翰林孔目遷吏部司務執政知其能
文用為制勅房中書供事內閣加官至參議

柯維騏字奇純莆田人高祖潛翰林學士父英徽州知府維騏舉嘉靖二年進士授南京戶部主事未赴輒引疾歸張孚敬用事劾新制京朝官病滿三年者概罷免維騏亦在罷中自是謝賓客專心讀書久之門人日進先後四百餘人維騏引掖靡倦慨近世學者樂徑易而憚積累竊二氏之說以文其固陋也作左右二銘訓學者務實以辨心術端趨向為實志以存敬畏密操履為實功而其極則以宰理人物成能天地為實用作講義

二卷宋史與遼金二史舊分三書維騏乃合之為一以
遼金附之而列二王於本紀獨出已見自為一書間二
十年而始成名之曰宋史新編又著史記考要續莆陽
文獻志及所作詩文集並行於世維騏登第五十載未
嘗一日服官中更倭亂故廬焚燬家困甚終不妄取世
味無所嗜惟嗜讀書撫按監司時有論薦不復起隆慶
初廷臣復薦所司以維騏年高但授承德郎致仕卒年
七十有八孫茂竹海陽知縣茂竹子昶副都御史巡撫

山西

王慎中字道思晉江人四歲能誦詩十八舉嘉靖五年進士授戶部主事尋改禮部祠祭司時四方名士唐順之陳東李開先趙時春任瀚熊過屠應埈華察陸銓江以達曾忭輩咸在部曹慎中與之講習學大進十二年詔簡部郎為翰林衆首擬慎中大學士張孚敬欲一見辭不赴乃稍移吏部為考功員外郎進驗封郎中忌者讒之孚敬因覆議真人張衍慶請封疏謫常州通判稍

遷戶部主事禮部員外郎並在南京久之擢山東提學
僉事改江西參議進河南參政侍郎王杲奉命振荒以
其事委慎中還朝薦慎中可重用會二十年大計吏部
註慎中不及而大學士夏言先嘗為禮部尚書慎中其
屬吏也與相忤遂內批不謹落其職慎中為文初主秦
漢謂東京下無可取已悟歐曾作文之法乃盡焚舊作
一意師倣尤得力於曾鞏順之初不服久亦變而從之
壯年廢棄益肆力古文演迤詳贍卓然成家與順之齊

名天下稱之曰王唐又曰晉江昆陵家居問業者踵至
年五十一而終李攀龍王世貞後起力排之卒不能掩
攀龍慎中提學山東時所賞拔者也慎中初號遵巖居
士後號南江屠應坡字文升平湖人刑部尚書勲子也
舉嘉靖五年進士由郎中改翰林官至右諭德華察字
子潛無錫人應坡同年進士累官侍講學士掌南京翰
林院陸銓字選之鄞人嘉靖二年進士與弟編修鈇爭
大禮並繫詔獄被杖後官廣西布政使鈇終山東提學

副使兄弟皆能文江以達字子順貴溪人嘉靖五年進士累官福建提學僉事

高叔嗣字子業祥符人年十六作申請賦幾萬言見者驚異十八舉於鄉第嘉靖二年進士授工部主事改吏部歷稽勲郎中出為山西左參政斷疑獄十二事人稱為神遷湖廣按察使卒官年三十有七叔嗣少受知慶陽李夢陽及官吏部與三原馬理武城王道同署以文藝相磨切其為詩清新婉約雖為夢陽所知不宗其說

陳東序其蘇門集謂有應物之冲澹兼曲江之沈雄體
王孟之清適具高岑之悲壯王世貞則曰子業詩如高
山鼓琴沈思忽往木葉盡脫石氣自青又如衛洗馬言
愁憔悴婉篤令人心折而蔡汝楠至推為本朝第一云
兄仲嗣官知府亦有才名汝楠字子木兒時隨父南京
聽祭酒湛若水講學輒有解悟年十八成嘉靖十一年
進士授行人從王慎中唐順之及叔嗣輩學為詩尋進
刑部員外郎徙南京刑部善皇甫孝兄弟尚書顧璘引

為忘年友廷議改歸德州為府擢汝楠知其府事以母憂歸聚諸生石鼓書院與說經治民有惠政既去士民祠祀之歷官江西左右布政使擢右副都御史巡撫河南召為兵部右侍郎從諸大僚祝釐西宮世宗望見其貌寢改南京工部右侍郎未幾卒汝楠始好為詩有重名中年好經學及官江西與鄒守一羅洪先游學益進然詩由此不工云

陳東字約之鄞人生而聰慧絕倫好讀古書會稽侍郎

董玘官翰林時聞東才召視之東垂髻而前試詞賦立就遂字以女攜至京文譽益起嘉靖八年廷對世宗親擢羅洪先程文德楊名為一甲而置唐順之及東任瀚於二甲皆手批其卷無何考庶吉士得胡經等二十人以東及順之瀚曾奉御批列經等首座主張璵霍韜以前此館選悉改他曹引嫌亦議改乃寢前命東授禮部主事時有嘉靖八才子之稱謂東及王慎中唐順之趙時春熊過任瀚李開先呂高也四郊改建都御史汪鉉

請徙近郊居民墳墓東疏諫不報遷員外郎改編修東
出總轡門不肯親附歲時上壽望門投刺輒馳馬過之
為所惡出為湖廣僉事分巡辰沅治有聲稍遷福建參
議改河南提學副使東故有嘔血疾會科試期迫試八
郡之士三月而畢疾增劇竟不起年纔三十有三妻董
亦能詩東卒未幾亦卒東竟無後當嘉靖初稱詩者多
宗何李東與順之輩厭而矯之東早世且藁多散逸今
所傳后岡集僅十之一二云任瀚字少海南充人嘉靖

八年進士改庶吉士未上授吏部主事屢遷考功郎中
十八年簡宮僚改左春坊左司直兼翰林院檢討明年
拜疏引疾出郭戒行疏再上不報復自引還給事中周
來劾瀚舉動任情蔑視官守帝令自陳瀚語侵掌詹事
霍韜帝怒勒為民久之遇赦復官致仕終世宗朝中外
屢薦不復用神宗嗣位四川巡撫劉思潔曾省吾先後
疏薦優旨報聞而已瀚少懷用世志百家二氏之書罔
不蒐討被廢益反求六經闡明聖學晚又潛心於易深

有所得文亦高簡卒年九十三熊過字叔仁富順人瀚
同年進士累官祠祭郎中坐事貶秩復除名為民李開
先字伯華章邱人東同年進士官至太常少卿性好蓄
書李氏藏書之名聞天下呂高字山甫丹徒人亦東同
年進士歷官山東提學副使鄉試錄文舊多出學使者
手巡按御史葉經乞順之文高心憾寓書京師友人言
經紕繆嚴嵩惡經遂置之死及後大計諸御史謂經禍
由高乃斥歸於八子中名最下

田汝成字叔禾錢塘人嘉靖五年進士授南京刑部主事尋召改禮部十年十二月上言陛下以青宮久虛祈天建醮復普放生之仁凡羈蹄鍛羽禁在上林者咸獲縱釋顧使囹圄之徒久纏徽纆衣冠之侶流竄窮荒父子長離魂魄永喪此獨非陛下之赤子乎望大廣皇仁悉加寬宥忤旨切責停奉二月屢遷祠祭郎中廣東僉事謫知滁州復擢貴州僉事改廣西右叅議分守右江龍州土酋趙楷憑祥州土酋李寰皆弑主自立與副使

翁萬達密討誅之努灘賊侯公丁為亂斷藤峽羣賊與相應汝成復偕萬達設策誘禽公丁而進兵討峽賊大破之又與萬達建善後七事一方遂靖有銀幣之賜遷福建提學副使歲當大比預定諸生甲乙比榜發一如所定汝成博學工古文尤善敘述歷官西南諳曉先朝遺事撰炎徼紀聞歸田後盤桓湖山窮浙西諸名勝撰西湖游覽志並見稱於時他所論著甚多時推其博洽子藝衡字子執十歲從父過采石賦詩有警句性放誕

不羈嗜酒任俠以歲貢生為徽州訓導罷歸作詩有才調為人所稱

皇甫濬字子安長洲人父錄弘治九年進士任重慶知府生四子冲濬沆瀛冲沆同登嘉靖七年鄉薦明年沆第進士又三年濬第進士又十三年瀛亦第進士而冲尚為舉子兄弟並好學工詩稱皇甫四傑冲字子浚善騎射好談兵遇南北內訌譟幾策兵統枕戈襟言三書凡數十萬言濬初授工部主事改禮部歷儀制員外郎

主客郎中在儀制時夏言為尚書連疏請建儲皆洊起
草故言深知洊才比簡宮僚遂用為春坊司直兼翰林
檢討言者論洊改官有私謫廣平通判量移南京刑部
主事進員外郎遷浙江僉事大計京官以南曹事論罷
邑邑發病卒洊沈靜寡與自負高俊稍不當意終日相
對無一言居官砥廉隅然頗操切多忤物故數被讒謗
云洊字子循七歲能詩官工部主事名動公卿沾沾自
喜用是貶秩為黃州推官屢遷南京稽勲郎中再貶開

州同知量移處州府同知擢雲南僉事以計典論黜沔
和易近聲色好狎游於兄弟中最老壽年八十乃卒瀟
字子約初授工部主事母喪除起故官典惜薪廠賈人
偽增數罔利瀟按其罪賈人女為尚書文明妾明召瀟
切責之瀟抗言曰公掌邦政縱奸人干紀又欲奪郎官
法守邪明為斂容謝大計謫河南布政司理問終興化
同知瀟兄弟與黃魯曾省曾為中表兄弟文藻亦相似
其後里人張鳳翼燕翼獻翼並負才名吳人語曰前有

四皇後有三張鳳翼燕翼終舉人而獻翼為太學生名
日益高年老矣狂甚為讐家所殺

茅坤字順甫歸安人嘉靖十七年進士歷知青陽丹徒
二縣母憂服闋遷禮部主事移吏部稽勲司坐累謫廣
平通判屢遷廣西兵備僉事轄府江道坤雅好談兵猺
賊據鬼子諸砦殺陽朔令朝議大征總督應禎以問坤
坤曰大征非兵十萬不可餉稱之今猝不能集而賊已
據險為備計莫若鵬勦倏入殲其魁他部必讐謀自全

此便計也。櫛善之悉以兵事委坤，連破十七砦。晉秩二等，民立祠祀之。遷大名兵備副使，總督楊博歎為奇才，特薦於朝。為忌者所中，追論其先任貪污狀，落職歸時。倭事方急，胡宗憲延之幕中，與籌兵事，奏請為福建副使。吏部持之，乃已。家人橫於里，為巡按龐尚鵬所劾，遂褫冠帶。坤既廢，用心計治生，家大起。年九十卒於萬曆三十九年。坤善古文，最心折唐順之。順之喜唐宋諸大家文，所著文編，唐宋人自韓柳歐三蘇曾王八家外無

所取故坤選八大家文鈔其書盛行海內鄉里小生無不知茅鹿門者鹿門坤別號也少子維字孝若能詩與同郡臧懋循吳稼燈吳夢陽並稱四子嘗詣闕上書希得召見陳當世大事不報

謝榛字茂秦臨清人眇一目年十六作樂府商調少年爭歌之已折節讀書刻意為歌詩西游彰德為趙康王所賓禮入京師脫盧柟於獄李攀龍王世貞輩結詩社榛為長攀龍次之及攀龍名大熾榛與論生平頗相鐫

責攀龍遂貽書絕交世貞輩右攀龍力相排擠削其名
於七子之列然榛游道日廣秦晉諸王爭延致大河南
北皆稱謝榛先生趙康王卒榛乃歸萬厯元年冬復游
彰德王曾孫穆王亦賓禮之酒闌樂止命所愛賈姬獨
奏琵琶則榛所製竹枝詞也榛方傾聽王命姬出拜光
華射人藉地而坐竟十章榛曰此山人里言耳請更製
以備房中之奏詰朝上新詞十四闋姬悉按而譜之明
年元旦便殿奏伎酒止送客即盛禮而歸姬於榛榛游

燕趙間至大名客請賦壽詩百章成八十餘首投筆而逝當七子結社之始尚論有唐諸家各有所重榛曰取李杜十四家最勝者熟讀之以會神氣歌詠之以求聲調玩味之以裒精華得此三要則浩乎渾淪不必塑謫仙而畫少陵也諸人心師其言厥後雖合力擯榛其稱詩指要實自榛發也盧柟字少樞濬縣人家素封輸貲為國學生博聞強記落筆數千言為人跣弛好使酒罵座常為具召邑令日晏不至柟大怒徹席滅炬而卧令

至柵已大醉不具賓主禮會柵役夫被榜他日牆壓死
令即捕柵論死繫獄破其家里中兒為獄卒恨柵笞之
數百謀以土囊壓殺之為他卒救解柵居獄中益讀所
攜書作幽鞠放招二賦詞旨沈鬱謝榛入京師見諸貴
人泣訴其冤狀曰生有一廬柵不能救乃從千古哀沅
而弔湘乎平湖陸光祖選得濬令因榛言平反其獄柵
出走謁榛榛方客趙康王所王立召見柵禮為上賓諸
宗人以王故爭客柵柵酒酣罵座如故及光祖為南京

禮部郎柟往訪之徧游吳會無所遇還益落魄嗜酒病三日卒柟騷賦最為王世貞所稱詩亦豪放如其為人李攀龍字子鱗歷城人九歲而孤家貧自奮於學稍長為諸生與友人許邦才殷士儋學為詩歌已益厭訓詁學日讀古書里人共目為狂生舉嘉靖二十三年進士授刑部主事歷員外郎郎中稍遷順德知府有善政上官交薦擢陝西提學副使鄉人殷學為巡撫檄令屬文攀龍怫然曰文可檄致邪拒不應會其地數震攀龍心

悸念母思歸遂謝病故事外官謝病不再起吏部重其才用何景明例特予告歸予告者例得再起攀龍既歸構白雪樓名日益高賓客造門率謝不見大吏至亦然以是得簡傲聲獨故交殷許輩過從靡間時徐中行亦家居坐客恒滿二人聞之交相得也歸田將十年隆慶改元薦起浙江副使改參政擢河南按察使攀龍至是摧亢為和賓客亦稍稍進無何奔母喪歸哀毀得疾疾少間一日心痛卒攀龍之始官刑曹也與濮州李先芳

臨清謝榛孝豐吳維岳輩倡詩社王世貞初釋褐先芳
引入社遂與攀龍定交明年先芳出為外吏又二年宗
臣梁有譽八是為五子未幾徐中行吳國倫亦至乃改
稱七子諸人多少年才高氣銳互相標榜視當世無人
七才子之名播天下擯先芳維岳不與已而榛亦被擯
攀龍遂為之魁其持論謂文自西京詩自天寶而下俱
無足觀於本朝獨推李夢陽諸子翕然和之非是則詆
為宋學攀龍才思勁鷲名最高獨心重世貞天下亦並

稱王李又與李夢陽何景明並稱何李王李其為詩務以聲調勝所擬樂府或更古數字為已作文則聱牙戟口讀者至不能終篇好之者推為一代宗匠亦多受世挾摘云自號滄溟梁有譽宗臣徐中行吳國倫皆嘉靖二十九年進士有譽除刑部主事居三年以念母告歸杜門讀書大吏至辭不見卒年三十九宗臣字子相揚州興化人由刑部主事調考功謝病歸築室百花洲上讀書其中起故官移文選進稽勲員外郎嚴嵩惡之出

為福建參議倭薄城臣守西門納鄉人避難者萬人或
言賊且迫曰我在不憂賊也與主者共擊退之尋遷提
學副使卒官士民皆哭徐中行字子興長興人美姿容
善飲酒由刑部主事歷員外郎郎中稍遷汀州知府廣
東賊蕭五來犯禦之有功策其且走俾武平令徐甫宰
邀擊之讓功甫宰甫宰得優擢尋以父憂歸補汝寧坐
大計貶長蘆鹽運判官遷湖廣僉事掩捕湖盜柯彩鳳
得其積貯活饑民萬餘累官江西布政使萬曆六年

卒官中行性好客無賢愚貴賤應之不倦故其死也人多哀之吳國倫字明卿興國人由中書舍人擢兵科給事中楊繼盛死倡衆賻送忤嚴嵩假他事謫江西按察司知事量移南康推官調歸德居二歲棄去嵩敗起建寧同知累遷河南左參政大計罷歸國倫才氣橫放好客輕財歸田後聲名籍甚求名之士不東走太倉則西走興國萬厯時世貞既沒國倫猶無恙在七子中最為老壽

王世貞字元美太倉人右都御史忬子也生有異稟書過目終身不忘年十九舉嘉靖二十六年進士授刑部主事世貞好為詩古文官京師入王宗沐李先芳吳維岳等詩社又與李攀龍宗臣梁有譽徐中行吳國倫輩相倡和紹述何李名日益盛屢遷員外郎郎中奸人間姓者犯法匿錦衣都督陸炳家世貞搜得之炳介嚴嵩以請不許楊繼盛下吏時進湯藥其妻訟夫寃為代草既死復棺殮之嵩大恨吏部兩擬提學皆不用用為青

州兵備副使父忬以灤河失事嵩搆之論死繫獄世貞
解官奔赴與弟世懋日蒲伏嵩門涕泣求貸嵩陰持忬
獄而時為謾語以寬之兩人又日囚服跪道旁遮諸貴
人輿搏顙乞救諸貴人畏嵩不敢言忬竟死西市兄弟
哀號欲絕持喪歸蔬食三年不入內寢既除服猶却冠
帶苴履葛巾不赴宴會隆慶元年八月兄弟伏闕訟父
冤言為嵩所害大學士徐階左右之復忬官世貞意不
欲出會詔求直言疏陳法祖宗正殿名廣恩義寬禁例

修典章推德意昭爵賞練兵實八事以應詔無何吏部
用言官薦令以副使涖大名遷浙江右叅政山西按察
使母憂歸服除補湖廣旋改廣西右布政使入為太僕
卿萬厯二年九月以右副都御史撫治鄖陽數條奏屯
田戍守兵食事宜咸切大計有奸僧偽稱樂平王次子
奉高皇帝御容金牒行游天下世貞曰宗藩不得出城
而譟張如此必偽也捕訊之服辜張居正枋國以世貞
同年生有意引之世貞不甚親附所部荊州地震引京

房占謂臣道太盛坤維不寧用以諷居正居正婦弟辱
江陵令世貞論奏不少貸居正積不能堪會遷南京大
理卿為給事中楊節所劾即取旨罷之後起應天府尹
復被劾罷居正歿起南京刑部右侍郎辭疾不赴久之
所善王錫爵秉政起南京兵部右侍郎先是世貞為副
都御史及大理卿應天尹與侍郎品皆正三世貞通理
前俸得考滿廕子比擢南京刑部尚書御史黃世榮言
世貞先被劾不當計俸據故事力爭世貞乃三疏移疾

歸二十一年卒於家世貞始與李攀龍狎主文盟攀龍
歿獨操柄二十年才最高地望最顯聲華意氣籠蓋海
內一時士大夫及山人詞客衲子羽流莫不奔走門下
片言褒賞聲價驟起其持論文必西漢詩必盛唐大歷
以後書勿讀而藻飾太甚晚年攻者漸起世貞顧漸造
平淡病亟時劉鳳往視見其手蘇子瞻集諷翫不置也
世貞自號鳳洲又號弇州山人其所與遊者大抵見其
集中各為標目曰前五子者攀龍中行有譽國倫臣也

後五子則南昌余曰德蒲圻魏裳歙汪道昆銅梁張佳
允新蔡張九一也廣五子則崑山俞允文濬盧柟濮州
李先芳孝豐吳維岳順德歐大任也續五子則陽曲王
道行東明石星從化黎民表南昌朱多燦常熟趙用賢
也末五子則京山李維禎鄞屠隆南樂魏允中蘭谿胡
應麟而用賢復與焉其所去取頗以好惡為高下余曰
德字德甫張佳允字肖甫張九一字助甫世貞詩所謂
吾黨有三甫也魏裳字順甫與曰德俱嘉靖二十九年

進士曰德終福建副使裳終濟南知府九一嘉靖三十
二年進士終巡撫寧夏僉都御史佳允自有傳汪道昆
字伯玉世貞同年進士大學士張居正亦其同年生也
父七十壽道昆文當其意居正亟稱之世貞筆之藝苑
卮言曰文繁而有法者于鱗簡而有法者伯玉道昆由
是名大起晚年官兵部左侍郎世貞亦嘗貳兵部天下
稱兩司馬世貞頗不樂嘗自悔獎道昆為違心之論云
胡應麟幼能詩萬厯四年舉於鄉久不第築室山中構

書四萬餘卷手自編次多所撰著攜詩謁世貞世貞喜而激賞之歸益自負所著詩數二十卷大抵奉世貞卮言為律令而敷衍其說謂詩家之有世貞集大成之尼父也其貢諛如此世貞弟世懋字敬美嘉靖三十八年成進士即遭父憂父雪始選南京禮部主事歷陝西福建提學副使再遷太常少卿先世貞三年卒好學善詩文名亞其兄世貞力推引之以為勝已攀龍道昆輩因稱為少美世貞子士騏字問伯舉鄉試第一登萬曆十

七年進士終吏部員外郎亦能文

歸有光字熙甫崑山人九歲能屬文弱冠盡通五經三史諸書師事同邑魏校嘉靖十九年舉鄉試八上春官不第徙居嘉定安亭江上讀書談道學徒常數百人稱為震川先生四十四年始成進士授長興知縣用古教化為治每聽訟引婦女兒童案前刺刺作吳語斷訖遣去不具獄大吏令不便輒寢閣不行有所擊斷直行已意大吏多惡之調順德通判專轄馬政明世進士為令

無遷倖者名為遷實重抑之也隆慶四年大學士高拱
趙貞吉雅知有光引為南京太僕丞留掌內閣制敕房
修世宗實錄卒官有光為古文原本經術好太史公書
得其神理時王世貞主盟文壇有光力相觝排目為妄
庸巨子世貞大憾其後亦心折有光為之讚曰千載有
公繼韓歐陽余豈異趨久而自傷其推重如此有光少
子子慕字季思舉萬曆十九年鄉試再被放即屏居江
村與無錫高攀龍最善其歿也巡按御史祁彪佳請於

朝贈翰林待詔有光制舉義湛深經術卓然成大家後
德清胡友信與齊名世並稱歸胡友信字成之隆慶二
年進士授順德知縣歲賦率奸胥攬輸稍以所入啗長
吏謂之月錢友信與民約歲為三限多寡皆自輸不取
贏閭里無妄費而公賦以充海寇竊發官軍往討民間
驛騷部內烏洲大洲賊所巢穴諸惡少為賊耳目友信
悉勾得之捕誅其魁餘黨解散鄉立四應社一鄉有警
三鄉鼓而援之不援者罪同賊賊不敢發歲大凶民饑

死無敢為惡者初友信慮民輕法蒞以嚴後令行禁止
更為寬大或旬日不笞一人其治縣如家獎修墮舉學
校城池咸為更新督課邑子弟教化興起卒官士民立
祠奉祀友信博通經史學有根柢明代舉子業最擅名
者前則王鏊唐順之後則震川思泉思泉友信別號也

明史卷二百八十七

欽定四庫全書

明史卷二百八十七考證

文徵明傳巡撫俞諫欲遺之金

臣章宗瀛按諫一日

過徵明廬門渠沮洳諫曰通此渠若於堪輿言定當
第徵明曰公無念渠渠通當損傍民舍異日諫乃悔
曰吾欲通文生渠奈何先言之吾終不能為文生德
也見獻徵錄謹附識

文徵明傳蔡羽由國子生授南京翰林院孔目

臣章

宗瀛按羽自弘治壬子應鄉試至嘉靖辛卯閱四十年凡十有四試不售乃以太學生赴選調天官卿素知其名曰此吾少日所聞蔡某今猶滯選調耶奏授孔目居三年歸卒於家見獻徵錄謹附考

文徵明傳女適趙宦光夫婦皆有聞於時

臣章宗瀛

按趙宦光字凡夫太倉人卜居寒山所著書數十種尤專精字學說文長箋其所獨擅也見吳縣志謹附考

文徵明傳王穀祥由進士改庶吉士歷官吏部員外郎
忤尚書汪鋐左遷真定通判以歸

臣章宗瀛謹按

書畫譜穀祥乞歸家居二十年隆慶初起南吏部不
受書倣晉人不墜右軍大令之風篆籀八體並臻妙
品兼善繪事點染花卉意致獨到謹識

黃佐傳謁大學士夏言與論河套事不合

臣章宗瀛

謹按曾銑議復河套言喜言邊功力主之見通鑑紀
事謹附考

柯維騏傳宋史與遼金三史合之為一以遼金附之獨
出已見自為一書 獨出已見自為一書舊本作褒
貶去取義例嚴整 臣章宗瀛按遼盛於唐時去宋甚
遠且後亦未嘗附宋自當另為一書至宋之於金稱
臣稱子遠不逮東晉之於魏乃拓跋既已成書而於
金史何疑焉是附遼金於宋義例已非傳中褒貶二
句殊未允當謹改

王慎中傳曾忤輩咸在部曹

臣章宗瀛按進士題名

錄曾忤泰和人嘉靖五年進士此作汴誤謹據改

詔簡部郎為翰林衆首擬慎中

臣章宗瀛按詔取才

學之臣十人以充史館慎中居首張孚敬使人語曰
得一見館職不足定也慎中不往乃黜用九人獨慎
中不用見獻徵錄謹附考

高叔嗣傳叔嗣少受知慶陽李夢陽

臣本作邑人李

夢陽

臣

章宗瀛按李夢陽慶陽人時寓居開封不得

謂之邑人據李夢陽傳謹改

陳束傳張璠霍韜以前此館選悉改他曹

臣章宗瀛

按嘉靖初張璠方得君好變易典制諸吉士皆少年
負氣不能往往抗視閣臣璠怒盡黜諸吉士見獻
徵錄謹附考

嚴嵩惡葉經遂置之死

臣章宗瀛按葉經初劾嚴嵩

受賂嵩心銜之二十二年經監山東鄉試嵩摘試錄
中謂有諷上語激帝怒逮至京廷杖死見通鑑紀事

謹附考

皇甫濂傳尚書文明召濂切責之濂抗聲曰公掌邦政
縱奸人干紀又欲奪郎官法守邪明為歛容謝大計
謫河南布政司理問終興化同知臣章宗瀛抗明
雖歛容謝而心中銜之乃出令權荊州稅會大計考
功郎中濂有忌謫河南理問稍遷興化同知歸數年
卒見獻徵錄謹附考

茅坤傳總督應檟以問坤坤曰大征非兵十萬不可餉
稱之今猝不能集而賊已據險為備計莫若鵬剿倭

入殲其魁他日必誓謀自全此便計也櫟善之悉以
兵事委坤連破十七砦

臣章宗瀛按櫟既以兵事

委坤乃簡部五千人團射角技遠徭以為常賊玩而
懈我兵爭願一戰遣善繪者圖其山川分所部兵為
七後先發約同日抵鬼子砦所過輒榜曰軍門進十
萬兵討殺陽朔令者他砦敢動先移兵滅之諸蠻見
旗幟徧山谷且怵於榜文皆不敢動於是連破十七
砦擒斬百五十人見獻徵錄謹附考

胡宗憲延之幕中

臣

章宗瀛按嘉靖四十二年宗憲

為浙閩總督給事中陸鳳儀劾之逮詣京宗憲自殺
坤上書訟其冤見綱鑑紀事謹附考

李攀龍傳稍長為諸生

臣

章宗瀛按王慎中督學山

東奇攀龍文擢為諸生見獻徵錄謹附考

梁有譽

臣

章宗瀛按有譽字用實南海人見獻徵錄

謹附考

王世貞傳用為青州兵備副使

臣

章宗瀛按青州豪

徐進道被訟罪不至死而進道恃其宗強黨衆陰謀
勒兵反世貞聞之故緩其獄令捕盜自効進道意漸
解遂縛之盡散其黨見獻徵錄謹附考

二十一年卒於家

臣章宗瀛按世貞卒贈太子太保

見明實錄謹附考

欽定四庫全書薈要卷六千八百八十一

史部

明史卷二百八十八

大學士張廷玉等奉 敕修

列傳第一百七十六

文苑四

李維禎 邦 敬

徐渭 屠 隆

王穉登 俞允文 王叔承

瞿九思

唐時升

婁 堅 程嘉燧

李流芳

焦

竑

黃 輝 陳仁錫

董其昌

莫如忠
米萬鍾

邢

伺

袁宏道

鍾惺
譚元春

王惟儉

李日華

曹學佺

曾異撰

王志堅

艾南英

章世純
羅萬藻

陳際泰

張溥

張采

李維禎字本寧京山人父裕福建布政使維禎舉隆慶二年進士由庶吉士授編修萬厯時穆宗實錄成進修撰出為陝西右參議遷提學副使浮湛外僚幾三十年天啓初以布政使家居年七十餘矣會朝議登用耆舊

召為南京太僕卿旋改太常未赴聞諫官有言辭不就
時方修神宗實錄給事中薛大中特疏薦之未及用四
年四月太常卿董其昌復薦之乃召為禮部右侍郎甫
三月進尚書並在南京維禎緣史事起用乃館中諸臣
憚其以前輩歷已不令入館但超遷其官維禎亦以年
衰明年正月力乞骸骨去又明年卒於家年八十崇禎
時贈太子太保維禎弱冠登朝博聞強記與同館許國
齊名館中為之語曰記不得問老許做不得問小李維

楨為人樂易闊達賓客雜進其文章弘肆有才氣海內
請求者無虛日能屈曲以副其所望碑版之文照耀四
裔門下士招富人大賈受取金錢代為請乞亦應之無
倦負重名垂四十年然文多率意應酬品格不能高也
邑人郝敬字仲興父承健舉於鄉官肅寧知縣敬幼稱
神童性跡弛嘗殺人繫獄維楨其父執也援出之館於
家始折節讀書舉萬曆十七年進士歷知縉雲永嘉二
縣竝有能聲徵授禮科給事中乞假歸養久之補戶科

數有所論奏山東稅監陳增貪橫為益都知縣吳宗堯所奏帝不罪敬上言開採不罷則陛下明旨不過為愚弄臣民之虛文乞先停止然後以宗堯所奏下撫按勘覈正增不法之罪不聽頃之山東巡撫尹應元亦極論增罪帝怒切責應元斥宗堯為民敬再上言陛下處陳增一事甚失衆心帝怒奪俸一年帝遣中官高宋推稅京口暨祿權稅儀真敬復力諫宗堯之劾增也增怒甚誣訐其賊私詞連青州一府官僚旁引商民吳時奉等

請皆籍沒帝輒可之敬復力詆增乞速寢其奏亦不訥
坐事謫知江陰縣貪污不檢物論皆不予遂投劾歸社
門著書崇禎十二年卒

徐渭字文長山陰人十餘歲做揚雄解嘲作釋毀長師
同里李本為諸生有盛名總督胡宗憲招致幕府與飲
余寅鄭沈明臣同筦書記宗憲得白鹿將獻諸朝令渭
草表并他客草寄所善學士擇其尤上之學士以渭表
進世宗大宗益寵異宗憲宗憲以是益重渭宗憲嘗宴

將吏於爛柯山酒酣樂作明臣作饒歌十章中有云狹
巷短兵相接處殺人如草不聞聲宗憲起將其鬚曰何
物沈生雄快乃爾即命刻於石寵禮與渭埒督府勢嚴
重將吏莫敢仰視渭角巾布衣長揖縱談幕中有急需
夜深開戟門以待渭或醉不至宗憲顧善之寅明臣亦
頗負崖岸以侃直見禮渭知兵好奇計宗憲禽徐海誘
王直皆預其謀藉宗憲勢頗橫及宗憲下獄渭懼禍遂
發狂引巨錐割耳深數寸又以椎碎腎囊皆不死已又

擊殺繼妻論死繫獄里人張元忭力救得免乃游金陵
抵宣遠縱觀諸邊阨塞善李成梁諸子入京師主元忭
元忭導以禮法渭不能從久之怒而去後元忭卒白衣
往弔撫棺慟哭不告姓名去渭天才超軼詩文絕出倫
輩善草書工寫花草竹石嘗自言吾書第一詩次之文
次之畫又次之當嘉靖時王李倡七子社謝榛以布衣
被擯渭憤其以軒冕壓韋布誓不入二人黨後二十年
公安袁宏道游越中得渭殘帙以示祭酒陶望齡相與

激賞刻其集行世寅字仲房明臣字嘉則皆有詩名屠
隆者字長卿明臣同邑人也生有異才嘗學詩於明臣
落筆數千言立就族人大山里人張時徹方為貴官共
相延譽名大噪舉萬厯五年進士除潁上知縣調繁青
浦時招名士飲酒賦詩游九峰三泖以仙令自許然於
吏事不廢士民皆愛戴之遷禮部主事西寧侯宗世恩
兄事隆宴游甚歡刑部主事俞顯卿者險人也嘗為隆
所詆心恨之訐隆與世恩淫縱詞連禮部尚書陳經邦

隆等上疏自理并列顯卿挾仇誣陷狀所司乃兩黜之而停世恩俸半歲隆歸道青浦父老為飲田千畝請從居隆不許歡飲三日謝去歸益縱情詩酒好賓客賣文為活詩文率不經意一揮數紙嘗戲命兩人對案拈二題各賦百韻咄嗟之間二章並就又與人對奕口誦詩文命人書之書不逮誦也子婦沈氏修撰懋學女與隆女瑤瑟並能詩隆有所作兩人輒和之兩家兄弟合刻其詩曰留香草

王穉登字伯穀長洲人四歲能屬對六歲能擘窠大字
十歲能詩長益駿發有盛名嘉靖末遊京師客大學士
袁煒家煒試諸吉士紫牡丹詩不稱意命穉登為之有
警句煒召數諸吉士曰君輩職文章能得王秀才一句
耶將薦之朝不果隆慶初復遊京師徐階當國頗修憾
於煒或勸穉登弗名袁公客不從刻燕市客趙二集備
書其事吳中自文徵明後風雅無定屬穉登嘗及徵明
門遙接其風主詞翰之席者三十餘年嘉隆萬厯間布

衣山人以詩名者十數俞允文王叔承沈明臣輩尤為
世所稱然聲華烜赫稱登為最申時行以元老里居特
相推重王世貞與同郡友善顧不甚推之及世貞歿其
仲子士驥坐事繫獄稱登為傾身救援人以是重其風
義萬厯中詔修國史大學士趙志舉輩薦稱登及其同
邑魏學禮江都陸弼黃岡王一鳴有詔徵用未上而史
局罷卒年七十餘子留字亦房亦以詩名俞允文字仲
蔚崑山人其父舉進士官大理評事允文年十五為馬

鞍山賦援据該博年未四十謝去諸生專力於詩文書
法與王世貞善而不喜李攀龍詩其持論不苟同如此
王叔承字承父吳江人少孤治經生業以好古謝去貧
贅婦家為婦翁所逐不予一錢乃攜婦歸奉母貧益甚
入都客大學士李春芳所性嗜酒春芳有所譏述覓之
往往卧酒樓欠伸弗肯應久之乃謝歸太倉王錫爵其
布衣交也再召會有三王並封之議叔承遺書數千言
謂當引大義以去就力爭不當依違兩端負主恩辜物

望錫爵得書歎服其詩極為世貞兄弟所許卒於萬厯中

瞿九思字審夫黃梅人父晟嘉靖三十二年進士厯官廣平知府鑿長渠三百里引水為四閘得田數十萬畝卒於官九思十歲從父宦吉安事羅洪先十五作定志論後從同郡耿定向游學益進舉萬厯元年鄉試居二年縣令張維翰違制苛派民聚毆之維翰坐九思倡亂巡按御史向程劾維翰變吏部尚書張瀚言御史議

非是九思遂長流塞下子甲年十三為書數千言歷抵公卿訟父冤甲弟罕亦伏闕上書求宥屠隆作訟瞿生書遍告中外馮夢禎亦白於楚中當事而張居正故才九思乃獲釋歸三十七年以撫按疏薦授翰林待詔力辭不受詔有司歲給米六十石終其身乃撰樂章及萬厯武功錄遣罕詣闕上之卒年七十一九思學極奧博其文章不雅馴然一時嗜古篤志之士亦鮮其儔甲字釋之年十九舉於鄉早卒罕字曰有七歲能文白父冤

時往返徒步不避寒餒天下稱雙孝崇禎時辟舉知州

唐時升字叔達嘉定人父欽訓與歸有光善故時升早

登有光之門年未三十謝舉子業專意古學王世貞官

南都延之邸舍與辨晰疑義時升自以出歸氏門不肯

復稱王氏弟子及王錫爵枋國其子衡邀時升入都值

塞上用兵逆斷其情形虛實將帥勝負無一爽者家貧

好施予灌園藝蔬蕭然自得詩援筆成不加點竄文得

有光之傳與里人婁堅程嘉燧並稱曰練川三老卒於

崇禎九年年八十有六妻堅字子柔幼好學其師友皆
出有光門堅學有師承經明行修鄉里推為大師貢於
國學不仕而歸工書法詩亦清新四明謝三賓知縣事
合時升堅嘉燧及李流芳詩刻之曰嘉定四先生集流
芳字長蘅萬厯三十四年舉於鄉工詩善書尤精繪事
天啓初會試北上抵近郊聞警賦詩而返遂絕意進取
程嘉燧字孟陽休寧人僑居嘉定工詩善畫與通州顧
養謙善友人勸詣之乃渡江寓古寺與酒人歡飲三日

夜賦咏古五章不見養謙而返宗禎中常熟錢謙益以
侍郎罷歸築耦耕堂邀嘉燧讀書其中閱十年返休寧
遂卒年七十有九

焦竑字弱侯江寧人為諸生有盛名從督學御史耿定
向學復質疑於羅汝芳舉嘉靖四十三年鄉試下第還
定向遶十四郡名士讀書崇正書院以竑為之長及定
向里居復往從之萬厯十七年始以殿試第一人官翰
林修撰益討習國朝典章二十二年大學士陳于陞建

議修國史欲竑專領其事竑遜謝乃先撰經籍志其他率無所撰館亦竟罷翰林教小內侍書者衆視為具文竑獨曰此曹他日在帝左右安得忽之取古庵人善惡時與論說皇長子出閣竑為講官故事講官進講罕有問者竑講畢徐曰博學審問功用維均敷陳或未盡惟殿下賜明問皇長子稱善然無所質難也一日竑復進曰殿下言不易發得毋諱其誤耶解則有誤問復何誤古人不恥下問願以為法皇長子復稱善亦竟無所問

竑乃與同列謀先啓其端適講舜典竑舉稽於衆舍已
從人為問皇長子曰稽者考也考集衆思然後舍已之
短從人之長又一日舉上帝降衷若有恒性皇長子曰
此無他即天命之謂性也時方十三齡答問無滯竑亦
竭誠啓迪嘗講次羣鳥飛鳴皇長子仰視竑輟講肅立
皇長子歛容聽乃復講如初竑嘗採古儲君事可為法
戒者為養正圖說擬進之同官郭正域輩惡其不相聞
目為賈譽竑遂止竑既負重名性復疏直時事有不可

輒形之言論政府亦惡之張位尤甚二十五年主順天鄉試舉于曹蕃等九人文多險誕語竑被劾謫福寧州同知歲餘大計復鐫秩竑遂不出竑博極羣書自經史至稗官雜說無不淹貫善為古文典正馴雅卓然名家集名澹園竑所自號也講學以汝芳為宗而善定向凡弟及李贄時頗以禪學譏之萬厯四十八年卒年八十五熹宗時以先朝講讀恩復官贈諭德賜祭廕子福王時追謚文端子潤生見忠義傳黃輝字平倩一字昭素南

充人竑同年進士幼穎異父子元官湖廣御史屬訊疑獄輝檢律如老吏御史聞而異之命員以至授錢穀集一覽輒記稍長博極羣書年十五舉鄉試第一久之成進士改庶吉士館課文字多沿襲熟爛目為翰林體及李攀龍王世貞之學行則又改而從之輝刻意學古一以韓歐為師館閣文稍變時同館中詩文推陶望齡書畫推董其昌輝詩及書與齊名至徵事輝十得八九竑以閎雅名亦自遜不如也由編修遷右中允充皇長子

講官時帝寵鄭貴妃疎皇后長子長子生母王恭妃幾
殆輝從內豎徵知其狀謂同里給事中王德完曰此國
家大事旦夕不測書之史冊謂朝廷無人吾輩為萬世
俸矣德完奮然屬輝具草上之下獄廷杖瀕死輝周旋
索饘不避險阻人或危之輝曰吾陷人於禍可坐視乎
輝雅好禪學多方外交為言者所論時已為庶子掌司
經局遂請告歸已起故官擢少詹事兼侍讀學士卒官
陳仁錫字明卿長洲人父允堅進士歷知諸暨崇德二

縣仁錫年十九舉萬厯二十五年鄉試聞武進錢一本

善易往師之得其指要久不第益究心經史之學多所

論著天啓二年以殿試第三人授翰林編修時第一為

文震孟亦老成宿學海內咸慶得人明年丁內艱廬墓

次服闋起故官尋直經筵典誥敕魏忠賢冒邊功矯旨

錫上公爵給世券仁錫當視草持不可其黨以威劫之

毅然曰世自有視草者何必我忠賢聞之怒不數日里

人孫文勇以誦步天歌見捕坐妖言鍛鍊成獄詞連仁

錫及震孟罪將不測有密救者得削籍歸崇禎改元召復故官旋進右中允署國子司業事再直經筵以預修神光二朝實錄進右諭德乞假歸越三年即家起南京國子祭酒甫拜命得疾卒福王時贈詹事謚文莊仁錫講求經濟有志天下事性好學喜著書一時館閣中博洽者鮮其儔云

董其昌字元宰松江華亭人舉萬曆十七年進士改庶吉士禮部侍郎田一鵠以教習卒官其昌請假走數千

里護其喪歸葬還授編修皇長子出閣充講官因事啟
沃皇長子每日屬之坐失執政意出為湖廣副使移疾
歸起故官督湖廣學政不徇請囑為勢家所怨嗾生儒
數百人鼓譟毀其公署其昌即拜疏求去帝不許而令
所司按治其昌卒謝事歸起山東副使登萊兵備河南
參政並不赴光宗立問舊講官董先生安在乃召為太
常少卿掌國子司業事天啓二年擢本寺卿兼侍讀學
士時修神宗實祿命往南方採輯先朝章疏及遺事其

昌廣搜博徵錄成三百本又採留中之疏切於國本藩
封人才風俗河渠食貨吏治邊防者別為四十卷做史
贊之例每篇係以筆斷書成表進有詔褒美宣付史館
明年秋擢禮部右侍郎協理詹事府事尋轉左侍郎五
年正月拜南京禮部尚書時政在奄豎黨禍酷烈其昌
深自引遠踰年請告歸崇禎四年起故官掌詹事府事
居三年屢疏乞休詔加太子太保致仕又二年卒年八
十有三贈太子太傅福王時諡文敏其昌天才俊逸少

負重名初華亭自沈度沈粲以後南安知府張弼詹事
陸深布政莫如忠及子是龍皆以善書稱其昌後出超
越諸家始以宋米芾為宗後自成一家名聞外國其畫
集宋元諸家之長行以己意瀟灑生動非人力所及也
四方金石之刻得其制作手書以為二絕造請無虛日
尺素短札流布人間爭購寶之精於品題收藏家得片
語隻字以為重性和易通禪理蕭閒吐納終日無俗語
人擬之米芾趙孟頫云同時以善書名者臨邑邢侗順

天米萬鍾晉江張瑞圖時人謂邢張米董又曰南董北
米然三人者不逮其昌遠甚莫如忠字子良嘉靖十七
年進士累官浙江布政使潔修自好夏言死經紀其喪
善草書詩文有體要是龍字雲卿後以字行更字廷韓
十歲能文長善書皇甫汈王世貞輩亟稱之以貢生終
邢侗字子愿萬曆二年進士終陝西行太僕卿家資鉅
萬築來禽館於古犁邱減產奉客遂致中落妹慈靜善
做兄書米萬鍾字友石萬曆二十三年進士歷官江西

按察使天啓五年魏忠賢黨倪文煥劾之遂削籍崇禎
初起太僕少卿卒官張瑞圖者官至大學士逆案中人
也

袁宏道字中郎公安人與兄宗道弟中道並有才名時
稱三袁宗道字伯修萬歷十四年會試第一授庶吉士
進編修卒官右庶子泰昌時追錄光宗講官贈禮部右
侍郎宏道年十六為諸生即結社城南為之長閒為詩
歌古文有聲里中舉萬歷二十年進士歸家下帷讀書

詩文主妙悟選吳縣知縣聽斷敏決公庭鮮事與士大
夫談說詩文以風雅自命已而解官去起授順天教授
歷國子助教禮部主事謝病歸久之起故官尋以清望
擢吏部驗封主事改文選尋移考功員外郎立歲終考
察羣吏法言外官三歲一察京官六歲武官五歲此曹
安得獨免疏上報可遂為定制遷稽勲郎中後謝病歸
數月卒中道字小修十餘歲作黃山雪二賦五千餘言
長益豪邁從兩凡宦游京師多交四方名士足跡半天

下萬曆三十一年始舉於鄉又十四年及成進士由徽州教授歷國子博士南京禮部主事天啓四年進南京吏部郎中卒於官先是王李之學盛行袁氏兄弟獨心非之宗道在館中與同館黃輝力排其說於唐好白樂天於宋好蘇軾名其齋曰白蘇至宏道益矯以清新輕俊學者多舍王李而從之目為公安體然戲謔嘲笑間雜俚語空疎者便之其後王李風漸息而鍾譚之說大熾鍾譚者鍾惺譚元春也惺字伯敬竟陵人萬曆三十

八年進士授行人稍遷工部主事尋改南京禮部進郎
中擢福建提學僉事以父憂歸卒於家惺貌寢羸不勝
衣為人嚴冷不喜接俗客由此得謝人事官南都僦秦
淮水閣讀史恒至丙夜有所見即筆之名曰史懷晚逃
於禪以卒自宏道矯王李詩之弊倡以清真惺復矯其
弊變而為幽深孤峭與同里譚元春評選唐人之詩為
唐詩歸又評選隋以前詩為古詩歸鍾譚之名滿天下
謂之竟陵體然兩人學不甚富其識解多僻大為通人

所譏元春字友夏名輩後於惺以詩歸故與齊名至天啓七年始舉鄉試第一惺已前卒矣

王惟儉字損仲祥符人萬曆二十三年進士授濰縣知縣遷兵部職方主事三十年春遼東總兵官馬林以忤稅使高淮被逮兵部尚書田樂等救之帝怒責職方不推代者空司而逐惟儉亦削籍歸家居二十年光宗立起光祿丞三遷大理少卿天啓三年八月擢右僉都御史巡撫山東值徐鴻儒之亂民多逃亡遼人避難來者

亦多失所惟儉加意綏輯五年三月擢南京兵部右侍郎未赴入為工部右侍郎魏忠賢黨御史田景新劾之落職閒住惟儉資敏嗜學初被廢肆力經史百家苦宗史繁蕪手刪定自為一書好書畫古玩萬厯天啓間世所稱博物君子惟儉與董其昌並而嘉興李日華亞之日華字君實嘉興人萬厯二十年進士官至太僕少卿恬澹和易與物無忤惟儉則口多微詞好抨擊道學人不能堪嘗與時輩讌集徵漢書一事具悉本末指其腹

笑曰名下寧有虛士乎其自喜如此

曹學佺字能始侯官人弱冠舉萬曆二十三年進士授戶部主事中察典調南京添注大理左寺正居冗散七年肆力於學累遷南京戶部郎中四川右參政按察使蜀府燬於火估修資七十萬金學佺以宗藩條例却之又中察典議調天啓二年起廣西右參政初挺擊獄興劉廷元輩主瘋顛學佺著野史紀畧直書事本末至六年秋學佺遷陝西副使未行而廷元附魏忠賢大幸乃

幼學佺私撰野史淆亂國章遂削籍燬所鏤板巡按御史王政新以嘗薦學佺亦勒閒住廣西大吏揣學佺必得重禍羈留以待已知忠賢無意殺之乃得釋還崇禎初起廣西副使力亂不就家居二十年著書所居石倉園中為石倉十二代詩選盛行於世嘗謂二氏有藏吾儒何獨無欲修儒藏與鼎立采擷四庫書因類分輯十有餘年功未及竣兩京繼覆唐王立於閩中起授太常卿尋遷禮部右侍郎兼侍講學士進尚書加太子太保

及事敗走入山中投繯而死年七十有四詩文甚富總
名石倉集萬歷中閩中文風頗甚自學佺倡之晚年更
以殉節著云其同邑後起者曾異撰字弗人晉江人家
侯官父為諸生早卒母張氏以遺腹生家窶甚紡績給
晨夕異撰起孤童事母至孝歲饑採薯葉雜糠粃食之
母妻嘗負畚鋤乾草給爨然性介甚長吏知其貧欲為
地不屑也吳興潘曾紘督學政上其母節行獲旌於朝
及曾紘巡撫南贛得王惟儉所撰宗史招異撰及新建

徐世溥更定未成而罷異撰久為諸生究心經世學所
為詩有奇氣崇禎十二年舉鄉試年四十有九矣再赴
會試還遂卒

王志堅字弱生崑山人父臨亨進士杭州知府志堅舉
萬曆三十八年進士授南京兵部主事遷員外郎郎中
暇日要同舍郎為讀史社撰讀史商語遷貴州提學僉
事不赴乞侍養歸天啓二年起督浙江驛傳奔母喪歸
崇禎四年復以僉事督湖廣學政禮部推為學政第一

六年卒於官志堅少與李流芳同學為詩文法唐宋名家通籍後卜居吳門古南園杜門却掃肆志讀書先經後史先史後子集其讀經先箋疏而後辨論讀史先證據而後發明讀子則謂唐宋而後無子當取說家之有裨經史者補之讀集則定秦漢以後古文為五編考覈唐宋碑志援史傳據雜說以參覈其事之同異文之純駁其於內典亦深辨性相之宗作詩甚富自選止七十餘首弟志長字平仲舉於鄉亦深於經學

艾南英字千子東鄉人七歲作竹林七賢論長為諸生
好學無所不窺萬厯末場屋文腐爛南英深疾之與同
郡章世純羅萬藻陳際泰以興起斯文為任乃刻四人
所作行之世世人翕然歸之稱為章羅陳艾天啓四年
南英始舉於鄉座主檢討丁乾學給事中郝土膏發策
詆魏忠賢南英對策亦有譏刺語忠賢怒削考官籍南
英亦停三科莊烈帝即位詔許會試久之卒不第而文
日有名負氣陵物人多憚其口始王李之學大行天下

談古文者悉宗之後鍾譚出而一變至是錢謙益竊重
名於詞林痛相糾駁南英和之排詆王李不遺餘力兩
京繼覆江西郡縣盡失南英乃入閩唐王召見陳十可
憂疏授兵部主事尋改御史明年八月卒於延平章世
純字大力臨川人博聞強記舉天啓元年鄉試宗禎中
累官柳州知府年已七十矣聞京師變悲憤邁疾卒羅
萬藻字文止世純同縣人天啓七年舉於鄉崇禎中行
保舉法祭酒倪元璐以萬藻應詔辭不就福王時為上

杭知縣唐王立於閩擢禮部主事南英卒哭而殯之居數月亦卒陳際泰字大士亦臨川人父流寓汀州武平生於其地家貧不能從師又無書時取旁舍兒書屏人竊誦從外兄所獲書經四角已漫滅且無句讀自以意識別之遂通其義十歲於外家藥籠中見詩經取而疾走父見之怒督往田則攜至田所踞高阜而哦遂畢身不忘久之返臨川與南英輩以時文名天下其為文敏甚一日可二三十首先後所作至萬首經生舉業之富

無若際秦者崇禎三年舉於鄉又四年成進士年六十有八矣又三年除行人居四年護故相蔡國用喪南行卒於道

張溥字天如太倉人伯父輔之南京工部尚書溥幼嗜學所讀書必手鈔鈔已朗誦一過即焚之又鈔如是者六七始已右手握管處指掌成繭冬日手皸日沃湯數次後名讀書之齋曰七錄以此也與同里張采共學齊名號婁東二張崇禎元年以選貢生入都采方成進士

兩人名徹都下已而采官臨川溥歸集郡中名士相與復古學名其文社曰復社四年成進士改庶吉士以葬親乞假歸讀書若經生無間寒暑四方噉名者爭走其門盡名為復社溥亦傾身結納交游日廣聲氣通朝右所品題甲乙頗能為榮辱諸奔走附麗者輒自矜曰吾以嗣東林也執政大僚由此惡之里人陸文聲者輸貲為監生求入社不許采又嘗以事扶之文聲詣闕言風俗之弊皆原於士子溥采為主盟倡復社亂天下溫體

仁方枋國士下所司遷延久之提學御史倪元珙兵備
參議馮元颺太倉知州周仲連言復社無可罪三人皆
貶斥嚴旨窮究不已閩人周之夔者嘗為蘇州推官坐
事罷去疑溥為之恨甚聞文聲訐溥遂伏闕言溥等把
持計典已罷職實其所為因及復社恣橫狀章下巡撫
張國維等言之夔去官無預溥事亦被旨譙讓至十四
年溥已卒而事猶未竟刑部侍郎蔡奕琛坐黨薛國觀
繫獄未知溥卒也訐溥遙握朝柄已罪由溥因言未結

黨亂政詔責溥米回奏米上言復社非臣事然臣與溥
生平相淬礪死避網羅負義圖全誼不出此念溥日夜
解經論文矢心報稱曾未一日服官懷忠入地即今嚴
綸之下并不得泣血自明良足哀悼當是時體仁已前
罷繼者張至發薛國觀皆不喜東林故所司不敢復奏
及是至發國觀亦相繼罷而周延儒當國溥座主也其
獲再相溥有力焉故米疏上事即得解明年御史劉熙
祚給事中姜采交章言溥砥行博聞所纂述經史有功

聖學宜取備乙夜觀帝御經筵問及二人延儒對曰讀書好秀才帝曰溥已卒采小臣言官何為薦之延儒曰二人好讀書能文章言官為舉子時讀其文又以其用未竟故惜之耳帝曰亦未免偏延儒言誠如聖諭溥與黃道周皆偏因善讀書以故惜之者衆帝領之遂有詔徵溥遺書而道周亦復官有司先後錄上三千餘卷帝悉留覽溥詩文敏捷四方徵索者不起草對客揮毫俄頃立就以故名高一時卒時年止四十采字受先與溥

善溥性寬泛交博愛采特嚴毅喜甄別可否人有過嘗面叱之知臨川推強扶弱聲大起移疾歸士民泣送載道知州劉士斗錢肅樂嚴重之以奸蠹詢采片紙報咸置之法福王時起禮部主事進員外郎乞假去南都失守奸人素銜采者羣擊之死復用大錐亂刺之已而甦避之鄰邑又三年卒

明史卷二百八十八

欽定四庫全書

明史卷二百八十八考證

李維楨傳山東稅監陳增貪橫為益都知縣吳宗堯所
奏巡撫尹應元亦極論增罪

臣章宗瀛按萬厯二

十六年九月宗堯奏太監陳增罔上營私益都有鉛
砂無銀礦增強之入銀業非法矣且代納稍緩逮入
吏民陛下所得十一而增私橐十九巡撫尹應元亦
叅增罪二十餘條忤者奪俸宗堯下鎮撫司削籍見

通鑑紀事謹附考

王穉登字伯穀長洲人能詩有盛名遊京師大學士袁
煒家煒試諸吉士紫牡丹詩不稱意命穉登為之有
警句臣章宗瀛按朱彞尊詩話云伯穀詩亦華整
第嫌肉多於骨至袁文榮所賞牡丹詩色借相公袍
上紫書生薄命原同妾等句媚竈之詞近於卑田乞
兒語矣謹附考

王叔承字承父

臣

章宗瀛按王叔承初名光允以字

行晚乃更字承父見朱彞尊詩話謹附考

程嘉燧傳舊本傳末云謙益最重其詩稱曰松圓詩老

臣章宗瀛按嘉燧詩為謙益所重亦不足為定評

傳末謙益最重其詩二句謹擬刪

陳仁錫傳孫文彥以誦步天歌見捕坐妖言鍛鍊成獄

詞連仁錫

臣章宗瀛按文彥仁錫戚也嘗作策論

朝時忠賢因誣文彥造妖言謗朝政置重辟所指妖言則韓愈原道欽天監步天歌也先是仁錫日在講

廷因王恭厥火災又見正人屠戮忠賢竭木土不休
講時不避忌諱忠賢復以不撰寧國封敕遂命許顯
仁擬文秀獄詞連仁錫等遂削籍歸見通鑑紀事謹
附考

董其昌傳始以宋朱芾為宗後自成一家

臣章宗瀛

按其昌云吾年十七學書師顏平原又學虞永興以
為唐書不如晉魏又學鍾王凡三年自謂逼古文徵
仲祝希喆不復置眼角比游嘉興見項子京家藏真

蹟又見官奴帖於金陵方悟從前妄自標評自此漸
有小得見畫禪室隨筆謹附識

米萬鍾字仲詔

舊本作字友石

臣章宗瀛謹按書

畫譜米萬鍾字仲詔關中人徙居京師性好石人謂
無南宮之顛而有其癖號為友石先生然則友石其
號而仲詔其字也傳以號作字誤謹改

張瑞圖者官至大學士

臣章宗瀛按瑞圖以天啟七

年晉禮部尚書東閣大學士崇禎元年三月致仕見

宰輔表謹識

父南英傳錢謙益竊重名於祠林

臣章宗瀛按謙益

謬竊虛名舊本作負重名負字未允謹改

附明史卷二百八十八考證後

乾隆四十一年

賜謚諸臣

曹學佺 謚忠節



總校官編修臣吳紹潔